

DOMENIE VIII «VIE PAL AN»

Antifone di jentrade cf. Sal 17,19-20

Mi à tignût sù il Signôr,
mi à liberât e puartât te largjure,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progjet di pâs,
e la tô Glesie e puedi servîti contente e cence pôris.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 49,14-15

Jo no ti dismentearai par mai.
Dal libri dal profete Isaie
Sion e diseve: «Il Signôr mi à bandonade,
e il Signôr mi à dismenteade».
Puedie la femine dismenteâsi dal so frut,
finî di vê dûl dal fi des sôs vissaris?
Ancje se lôr si dismenteassin,
jo no ti dismentearai par mai.
Peraule di Diu.

SALM RESPONSORIÂL dal Salm 61

R. Di te, Signôr, mi fidi e li di te mi pari.
Dome in Diu si cuiete la mê anime,
parcè che di lui e ven la mê salvece.
Dome lui al è la mê crete e la mê salvece,
il fuartin che mi pari: no cloparai par mai. **R.**

Dome in Diu si cuiete la mê anime,
parcè che di lui e ven la mê sperance.
In Diu e je la mê salvece e la mê glorie;
il fuartin che mi pare e il gno ripâr a son in Diu. **R.**

Fidaitsi simpri di lui, vualtris che o sês il so popul;
denant di lui sbrocait il vuestri cûr.
La potence e je di Diu
e al è to, Signôr, il boncûr. **R.**

SECONDE LETURE 1 Cor 4,1-5

Il Signôr al palesarà lis intenzions dai cûrs.

De prime letare di san Pauli apuestul ai Corints
Fradis, ognidun al à di cjalânus come servidôrs di Crist e ministradôrs dai misteris di Diu.
Poben dut ce che si pretint dai ministradôrs al è che ognidun al sedi cjatât fedêl.
Par chel che mi rivuarde me, no mi impuarte nuie di jessi judicât di vualtris o di un tribunâl uman;
che anzit, no mi judichi nancje par cont gno, parcè che se ancje no sai di vê fat alc di mâl, no par
chel o soi justificât. Chel che mi judiche al è il Signôr! Par chel no stait a fâ nissun judizi prime dal

timp, fin che nol torne il Signôr. Lui al metarà in lûs i segrets che a son tal scûr e al palesarà lis intenzions dal cûr; e in chê volte ognidun al varà di Diu la laude che si merte.
Peraule di Diu.

CJANT AL VANZELI Zn 15,15

R. Aleluia, aleluia.

Us ài clamâts amîs, al dîs il Signôr,
parcè che dut ce che o ài sintût di gno Pari
us al ài fat cognossi.

R. Aleluia.

VANZELI Mt 6,24-34

No stait a tormentâsi pal doman.

Dal vanzeli seont Matieu

In chê volte Jesù al disè ai siei dissepui: «Nissun nol pues servî doi parons; parcè che o al odearà un e i volarà ben a di chel altri, o si tacarà a un e al trascurarà chel altri. No podês servî Diu e mamone. Par chel us dîs: pe vuestre vite no stait a lambicâsi di ce che o mangjarês e o bevarês; e nancje pal vuestri cuarp, di ce che o vês di metisi intor. La vite no valie forsît plui de bocjade e il cuarp plui de munture? Po cjalait i ucei dal cîl: no semenin, no seselin, no ingrumin sui cjascj. Cun dut a chel, il Pari vuestri celest ju manten; e vualtris no valêso plui di lôr? Cui di vualtris, par tant che al scombati, isal bon di zontâ un sôl comedon a la sô stature? E par cont dal vistût, parcè si tormentaiso? Cjalait i zîs de campagne, cemût che a vegnin sù: no lavorin e no tiessin. Cun dut a chel, us dîs che nancje Salomon, in dut il so sflandôr, nol jere vistût come un di lôr. Se Diu al vistis cussì la jerbe de campagne, che vuê e je e doman le butin tal fûc, trop no us vistissaraial vualtris, int di pocje fede? No stait a tormentâsi duncje disint: Ce bevarîno? o: Ce vistît si metarîno intor? Dutis chestis robis lis cirin i paians. Ma il Pari vuestri celest al sa che us coventin dutis chestis robis. Cirît prin di dut il ream di Diu e la sô justizie, e dutis chestis robis us saran dadis in soreplui. No stait a tormentâsi duncje pal doman, parcè che il doman al varà za i siei fastidis. Ogni di ind à avonde de sô fadie».

Peraule dal Signôr.

Su lis ufiertis

Diu, che tu nus dâs ce che nô o ufrin al to non
e tu metis l'ufierte in cont dal nestri servizi e suditance,
o suplichin il to boncûr
che al deventi par nô un premi
ce che par tô bontât al ven segnât a nestri merit.
Par Crist nestri Signôr.

Antifone a la comunion cf. Sal 12,6

I cjantarai al Signôr che mi à judât,
o vuei laudâ il non dal Signôr, l'Altissim.

O ben: Mt 28,20

Ve che jo o soi cun vualtris ducj i dîs,
fin a la fin dal mont, al dîs il Signôr.

Daspò de comunion

Daspò di vênus sostentâts cul to regâl che al salve,
o prein, Signôr, il to boncûr:
par che, cun chest sacrament che tu nus nudrissis tal timp,

tu nus fasis vê part de vite eterne.
Par Crist nestri Signôr.